

未 411

7

時疫白喉捷要



光緒乙酉仲夏

時疫白喉捷要

衡山聶氏重刊



時疫白喉捷要序

古醫分十三科喉科尤急蓋喉病者存亡死生懸於呼吸險孰甚焉業是科者名號專門學宜通博凡大方脉中諸名家書固宜細參卽喉科專書亦宜廣搜博考一切脉象舌胎病源病證藥性藥方俱宜求其精理棄其浮詞庶幾於陰陽表裏虛實寒熱標病本病無不深知循規矩而不拘泥達變化而不謬妄斯不致殺人如操刃矣時疫內有白喉一證吳俗名爛喉痧最爲危險患此者多半不治考之昔人論喉病

諸書不惟不載治法抑且無此名稱惟吳醫彙講載
李純修及祖鴻範爛喉痧兩論亦云古書不載起於
近時疫癘之氣極易傳染治法宜清透消降若元氣
日虛毒氣深伏色白如粉皮樣者爲不治之證又驗
方新編載治白喉蠟蛾子法雖用藥大致亦以除瘟
解毒爲法無如言之不詳用之者不無疑慮蓋一則
有論無方一則有方無論皆喉科中缺陷之端也淮
川張君紹修以醫名當世著時疫白喉捷要一書皆
臨證治驗其論親切而有味其方備載而無遺可謂

獨具匠心發前人未發之奇救人世不救之病者矣
昔年板藏前浙江巡撫胡恕堂中丞家外間印本頗
少茲重付手民以廣流傳俾患此證者得慶更生亦
猶張君活人之意也夫

光緒十一年乙酉仲夏日聶緝梨仲芳氏序

時疫白喉捷要目錄

專治時疫白喉嚨症論

白喉嚨續論

白喉嚨看法

白喉嚨治法

除瘟化毒散

神功辟邪散

神仙活命湯

龍虎二仙湯



雄黃解毒丸

清心滌肺湯

養正湯

銀花四君子湯

瓜霜散

無治之症

附治白喉方



時疫白喉捷要

湖
南
淮
川
張
紹
修
善
吾
氏
著

專治時疫白喉隴症論

白喉有時疫一症其發有時其傳染甚速其病至危
至險治者每多束手無策修考之諸書臨症日久竊
以爲其治有十難焉蓋此症乃纏喉急痺緩治則死
凡咽喉不利口渴舌燥頸腫目赤耳痛唇紅皆上攻
頭面之症邪熱客於心肺之間似與他經無涉其有
兼及他經者體氣虛弱邪氣乘虛而入皆後之傳變



名曰越經時未傳及他經不察其源治以他經之藥其難一也大抵其症初起惡寒發熱頭痛背脹精神倦怠遍身骨節疼痛喉內有極痛者有微痛者初無形迹可見似傷寒傷風表症若投以麻桂細辛羌防升柴蘇葉之類致毒渙散無可挽回其難二也彼其惡寒發熱乃毒氣初作於內至二三日喉內現白現後寒熱自除或者不悟誤以爲表藥有功豈知白現後卽不服表藥而發熱亦止耶一起誤服羌防麻桂非徒無益而又害之其難三也按此病熱症多寒症

少有以色白爲寒者不思此症初發於肺肺屬金其
色白爲五臟六腑之華蓋處至高之位毒氣薰蒸自
下而上肺病日深故其本色日著治宜解五臟之毒
使之下行勿令蓄積於肺若因色白疑爲寒症以附
桂炮姜投之是謂抱薪救火愈熾愈烈其難四也卽
有知爲火毒不可輕用升提開散之品輒以芒硝大
黃下之不知此症已傳至上焦氣分與中下焦無涉
旣上焦氣分受傷又以硝黃攻伐太過使中下焦有
損元氣愈傷其難五也見症確藥當守方有火毒甚

者初起用消風敗毒引熱下行之劑治法良是乃日服二三劑而白不退連服十數劑而白愈有加是猶杯水車薪與事無濟治者當詳審病源或舌胎黃黑喉乾唇焦小便短澀微黃大便瀉泄帶黑是謂火毒凝結內病不除白何能淨愈發白愈守方久久投之自有效驗若另更別方必生變故其難六也察之既精圖治不容緩此乃瘟疫之變症殺人最速過七日不起庸醫辨症未明投以平淡之劑不求有功但求免過是謂優容養奸迨延至五六日毒氣重矣元氣

傷矣善治者不得以猛劑攻之然病已垂危成則無功一旦不起病家不咎優容之過反云猛劑非宜此非誤於後而實誤於前其難七也有非白喉而轉爲白喉者初起喉痛紅腫或惡寒發熱或不惡寒發熱一邊腫名曰單蛾兩邊腫名曰雙蛾治之稍緩則氣閉不起宜用生土牛膝兜引熱下行大便閉用大黃否則不必用此與白喉症異治同倘不預防轉爲白喉爲禍甚烈其難八也又有勞症白喉陰虛火燥痛極而水米難下漸至朽爛形容枯槁面目憔悴必

需補劑使元氣充滿而喉痛自愈若以時行疫症白
喉誤認陰虛差之毫釐失之千里其難九也更有一
種白喉無惡寒發熱等症喉內起白皮隨落隨長的
是寒症非附桂不愈卽誤服消風敗毒之藥亦無太
損若以時行疫症白喉認爲此症爲害不淺其難十
也知此十難臨症審治十不失一難不終難修持此
法活人多矣時疫流行而益不敢自秘謹將看法治
法方法編次成書非敢云濟世之良方亦足爲刀圭
之一助云爾

白喉嚨續論

白喉治法浩渺無憑

修

自稽考以來時深討論每臨

編得其法未必見其病臨病見其症未必合其方可

見病態多端惟貴圓通而知其要耳

修

曾立白喉嚨

症論一篇以傳於世奈白喉一症愈出愈險有朝發

夕死者延街合巷互相沾染治之不速十難全一噫

真可慘也竊此症乃瘟疫惡症必需詳審外症細察

脉情看明喉嚨內外兩關白多白少及小大厚薄方

可下藥否則以輕劑而治重病其禍甚烈以重劑而

治輕病其害尤深過猶不及誠哉是言也其症初起
憎寒壯熱口渴喉乾聲音不出湯水不入痰涎壅塞
脹閉疼痛異常滿喉皆白脈多洪數甚者且無至數
此乃時行厲氣爲病喉症中最急者也或者謂咽喉
病忌用寒涼謬妄殊甚每見投以荊防敗毒散大承
氣湯者指不勝屈不知以硝黃瀉胃中之實熱是謂
誅伐無過病以適至其危篤以羌防理太陽之遊風
致使渙散其毒病必漸入於膏肓修立除瘟化毒散
神功辟邪散神仙活命湯已用之屢矣皆能立起沈

病但恐病勢太重猶嫌藥力稍輕再立龍虎二仙湯
日服三四劑連服數日不必更方縱食不下咽斷不
至寒涼過度胃氣告匱所謂有病則病受也白退而
藥卽止徐徐調理元氣不難充滿惟症尤烈者實火
爲患臟腑積熱太深堵塞咽喉隘地呼吸不通服雄
黃解毒丸亦妙究係厲劑不可輕用慎之慎之然所
論雖屬詳明治者尤宜達變通權兼以閱歷方能隨
手應效活人之法當無出此若輕忽怠玩耽擱日期
使面青唇黑氣急痰壅煩燥神昏攻之不可達之不

及雖盧扁復生不可爲也管見如此望高明酌之

白喉嚨看法

初起惡寒發熱頭痛背脹遍身骨節疼痛喉內或極痛或微痛或不痛而喉內微硬有隨發而白隨現者有至二三日而白始現者或由白點白條白塊漸至滿喉皆白所治皆同服藥後喉內或白收緊或白稀疏或白微小或白轉黃久之必然退淨但此病非比他病貴在見幾早尤貴治者精若心粗氣浮輕視此症有非白喉而妄稱爲白喉遽以猛劑攻之者有真